

- राज्य मंत्रिपरिषद की मीटिंग मांय नौ नुवा जिला अर तीन नुवा संभाग निरस्त करण रो फैसलो करी ज्यो-आठ नुवा जिला बण्या रहवेला।
- देवलोक व्ह्या पैली वाळा प्रधानमंत्री डॉ. मनमोहन सिंह रो आज पूरा सरकारी मान सागे दाग करी ज्यो।
- प्रदेश मांय आवता चौबीस घंटा मांय जयपुर, कोटा, अजमेर अर बीकानेर संभाग मांय बादळां री गरज सागे बिरखा रा आसार।
- प्रधानमंत्री नरेन्द्र मोदी काल आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला।

000

राज्य मांय गहलोत राज मांय बणायी ज्यो नुवा जिलां मांय ऊं नौ जिला खत्म करण जदके आठ जिला बरकरार राखण रो फैसलो करी ज्यो है। मुख्यमंत्री भजनलाल शर्मा री सदरत मांय आज मुख्यमंत्री रा दफतर मांय व्ही मंत्रिपरिषद की मीटिंग मांय ओ फैसलो करी ज्यो। मीटिंग मांय सीकर, पाली अर बांसवाड़ा ने दियो ज्यो संभाग रो दर्जो ई रह करण रो फैसलो करी ज्यो। संसदीय कार्यमंत्री जोगाराम पटेल अर खाद्य मंत्री सुमित गोदारा मीटिंग मांय करी ज्यो फैसलां री जाणकारी दीनी। वे बतायो के दूदू, केकड़ी, शाहपुरा, नीमकाथाना, सांचौर, अनूपगढ़, जयपुर ग्रामीण, जोधपुर ग्रामीण अर गंगापुरसिटी रो जिला रो दर्जो पाछो ले लियो जावेला। बालोतरा, ब्यावर, डीग, डीडवाना-कुचामन, कोटपूतली-बहरोड़, खैरथल-तिजारा, फलौदी अर सलूम्बर जिला बण्या रहवेला। ई फैसला पाछे अब प्रदेश मांय 7 संभाग अर 41 जिला रहवेला। श्री पटेल कह्यो के हटावण वाळा जिला राज्य माथे गैर-जरूरी भार डाल रह्या हा। वे कह्यो के नुवा बणायी ज्यो जिलां रा बारा मांय ओजू विचार करण सारू बणायी ज्यो समिति री सिफारिश परां आं जिला ने निरस्त करण रो फैसलो करी ज्यो।

दूजी कानी राज्य रा पैली वाळा मुख्यमंत्री अशोक गहलोत खबरनवीसां सागे बातचीत करता थकां कह्यो के वां रा राज मांय आबादी अर सुशासन ने ध्यान राखता थकां नुवा जिला बणायी ज्यो हा।

मीटिंग मांय करी ज्यो फैसलां री जाणकारी देता थकां मंत्री गोदारा खबरनवीसां ने बतायो के खाद्य सुरक्षा योजना मांय नुवा पात्र लोग जोड़्या जावेला। वे बतायो के खाद्य सुरक्षा योजना रो फायदो लेवण वाळां ने केवाईसी करावण सारू तीन महीना और देवण रो फैसलो करी ज्यो है।

कैबिनेट की मीटिंग मांय कुछ और फैसला ई करी ज्यो। आं रे मुजब राज्य मांय ग्राम पंचायतां रो ओजू गठन कर्यो जावेला। मीटिंग मांय समान पात्रता परीक्षा रा नतीजा री वैधता री मियाद तीन साल करण अर आवता चार साल मांय तीन लाख सरकारी नौकरियां देवण रा फैसला ई करी ज्यो। परिनिंदा दंड खत्म करण अर पशुधन सहायकां रा पदनाम मांय बदलाव ने ई मंजूरी दीरीजी।

000

देवलोक व्ह्या प्रधानमंत्री डॉ. मनमोहन सिंह रो आज नई दिल्ली रा निगम बोध घाट माथे पूरा सरकारी मान सागे दाग कर दियो ज्यो। दाग ऊं पैली सिख ग्रंथी अर डॉ. सिंह रा पिरवार वाळा गुरबाणी रो पाठ कीनो। औपचारिक तौर ऊं गार्ड ऑफ ऑनर दियां पाछे राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी, केई केन्द्रीय मंत्री अर लोकसभा अध्यक्ष ओम बिरला वां ने श्रद्धांजलि दीनी। कांग्रेस अध्यक्ष मल्लिकार्जुन खड़गे, पार्टी रा नेता सोनिया गांधी अर राहुल गांधी समेत पार्टी रा केई नेता ई डॉ. सिंह ने आखिरी विदाई दीनी। फौज रा तीन ई अंगां रा मुखिया ई डॉ. सिंह ने पुष्पांजलि अर्पित कीनी। भूटान नरेश जिग्मे खेसर नामग्याल वांगचुक अर मॉरीशस रा विदेश मंत्री धनंजय रामफल ई डॉ. सिंह ने पुष्पांजलि अर्पित कीनी। डॉ. मनमोहन सिंह 92 साल री उम्र मांय 26 दिसम्बर ने नई दिल्ली रा एम्स अस्पताल मांय आखिरी सांस लीनी ही। प्रदेश मांय ई न्यारी-न्यारी ठोडां डॉ. सिंह ने सिरधाभाव सागे याद करी ज्यो।

000

प्रदेश मांय आवता चौबीस घंटा मांय जयपुर, कोटा, अजमेर अर बीकानेर संभाग मांय बारिश रा आसार है। जयपुर, अजमेर अर भरतपुर संभाग मांय कठे-कठे ओळा पड़बा री संभावना है। ई सागे ई दिन री बगत पारो उत्तरण री संभावना ई है। मौसम विभाग आवता 3-4 दिनां ताई राज्य रा कुछ हलकां मांय घणो कोहरो रेहवण रा आसार जताया है। ई बीचे आज ई बारां अर पाली समेत केई ठोडां संवारे मोड़ा ताई धुंअर रही। म्हाणा बारां खबरनवीस बतायो के घणी धुंअर ऊं आवण-जावण माथे असर पड़्यो है।

हनुमानगढ़ मांय ई धुंअर रही। अजमेर मांय दो दिन ऊं व्हे रही बिरखा रो दौर आज रुक ग्यो, ज्यीं पाछे बाजारां अर सैर-सपाटा री ठोडां ओजू चहल-पहल निजर आवण लागी है।

000

प्रदेश री गौशालावां अर डेयरियां मांय पशुधन सारू गौपालन विभाग एडवाइजरी जारी कीनी है। सिंयाळा ने ध्यान राखता थकां ओ परामर्श जारी करी ज्यो है। पशुपालन, गौपालन अर डेयरी सचिव डॉ. समित शर्मा बतायो के ढांढां-ढोरां ने ठंड ऊं बचावण सारू छत हेटे राखण, कम्बल अर जूट री बोरियां पहरावण अर सूखो चारो काम लेवण बाबत कही ज्यो है। ई सागे ई रूत रे मुजब चारो-पाणी देवण अर गुनगुनो पाणी पावण री राय दीरीजी है।

000

प्रदेश मांय सैर-सपाटा री ठोडां मोटी तादाद मांय सैलाणी पूग रह्यो है। जैसलमेर, सवाईमाधोपुर, जोधपुर, उदयपुर, माउंट आबू अर राजधानी जयपुर मांय क्रिसमस री छुट्टियां बीचे मोटी तादाद मांय सैलाणी पूग रह्यो है। सवाईमाधोपुर जिला रा रणथम्भौर मांय ई नुवा साल रो जश्न मनावण सारू मोकळा सैलाणी पूग रह्यो है। म्हाणा खबरनवीस बतायो के इण ने ध्यान राखता थकां पर्यटन कारोबारी अर प्रशासन खास इंतजामात कीना है।

पैली वाळा प्रधानमंत्री डॉ. मनमोहन सिंह रे देवलोक व्हेवण रे कारण ऐलाण करी ज्यो सरकारी शोक रे कारण सांस्कृतिक समारोह निरस्त कर दिया ज्यो है।

माउंट आबू मांय काल सारू व्हेवण वाळो शरद महोत्सव निरस्त कर दियो ज्यो है, जदके राजधानी जयपुर रा अल्बर्ट हॉल मांय हर पखवाड़ा व्हेवण वाळो कार्यक्रम “कल्वरल डायरीज” ई ई पखवाड़ा मांय नी राख्यो जावेला। जवाहर कला केन्द्र मांय व्हेवण वाळा मधुरम उत्सव अर नाटक रा कार्यक्रम ई टाळ दिया ज्यो है।

000

प्रधानमंत्री नरेन्द्र मोदी काल आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 117वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। आकाशवाणी समाचार री वेबसाइट अर न्यूज ऑन एआईआर मोबाइल एप माथे ई ओ कार्यक्रम प्रसारित कर्यो जावेला। इण ने आकाशवाणी समाचार, डी.डी. न्यूज, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई सुण्यो जा सके है।

000

श्रीगंगानगर जिला रा श्रीकरणपुर मांय सीमांत गांव 36 एच नग्गी हलका मांय बण्या नग्गी शहीद स्मारक माथे नग्गी दिवस वीर शहीदां री याद मांय कार्यक्रम राख्यी ज्यो। बी.एस.एफ री 77वीं वाहिनी अर फौज री फोर मिलिट्री गढवाल राईफल्स रा अहलकार अर जवान साल 1971 री भारत-पाकिस्तान लड़ाई मांय वीर गति हासिल करण वाळा 21 जवानां री मूरत माथे सिरधा रा फूल चढ़ाया। ई रे अलावा नग्गी दिवस रा सिलसिला मांय साधुवाली कैन्ट ऊं नग्गी ताई दौड़ राख्यी ज्यी अर नशा ऊं दूर रेहवण रो संदेश दियो ज्यो। ई रे अलावा 316 आर्मी फील्ड हॉस्पिटल साधुवाली रा डॉक्टरां री टीम मरीजां री स्वास्थ्य जांच कर र मुफ्त दवाइयां दीनी। दूजी कानी नीमकाथाना जिला रा रामकुमारपुरा मांय शहीद रामकुमार गुर्जर री 53 वीं बरसी रे मौके किसान सम्मेलन अर श्रद्धांजलि सभा राख्यी ज्यी।

000

जम्मू कश्मीर रा लेह मांय ड्यूटी रे दौरान देश सारू सब ऊं मोटो बलिदान देवण वाळा हनुमानगढ़ जिला रा पल्लू तहसील रा हमीरदेसर रा रेहवासी जाट रेजीमेंट रा जवान हरिकृष्ण रो आज वां रा गांव मांय पूरा मान सागे दाग कर दियो ज्यो। दाग मांय फौज रा अहलकार, जनता रा नुमाइंदा अर मोटी तादाद मांय गांव वाळा मौजूद रह्या।

000

भारतीय अंतरिक्ष अनुसंधान संगठन-इसरो सोमवार ने छोड़्या जावण वाळा स्पेस डोकिंग एक्सपेरिमेंट-स्पेडेक्स मिशन री सगळी जरूरी तैयारियां पूरी कर लीनी है। अंतरिक्ष राज्य मंत्री डॉ. जितेन्द्र सिंह एक इन्टरव्यू मांय कह्यो के साल रा आखिर मांय छोड़्या जावण वाळा ई ऐतिहासिक मिशन रे जरिये दो उपग्रहां ने जोड़्या जावेला।

000